



外科正宗卷五

海甯許 鑑華本評

明崇川陳實功著 吳江徐大椿靈胎評

海甯蔣光焻寅昉校

瘰癧類第二十六

夫瘰癧者。有風毒熱毒氣毒之異。又有瘰癧筋癧痰癧之殊。風毒者。外受風寒。伏於經絡。其患先寒後熱。結核浮腫。熱毒者。天時亢熱。暑中三陽。或內食膏梁厚味。釀結成患。色紅微熱。結核堅腫。氣毒者。四時殺厲。

之氣。感冒而成。其患耳項胸腋驟成腫塊。令人寒熱。頭眩。項強作痛。瘰癧者。累累如貫珠。連接三五枚。此不作寒熱。其患得於誤食蟲蟻鼠殘不潔之物。及宿茶陳水。或內有汙液。其患先小後大。初不覺疼。久方知痛。筋癧者。憂愁思慮。暴怒傷肝。蓋肝主筋。故令筋縮。結蓄成核。生於項側筋間。形如棋子。堅硬大小不一。或陷或凸。久則虛羸。多生寒熱。勞怒則甚。痰癧者。飲食冷熱不調。饑飽喜怒不常。多致脾氣不能傳運。遂成痰結。初起如梅如李。生及徧身。久則微紅。後必

潰破易於收斂。凡觀此症分別施治。風毒者散其風除其溼。如防風解毒湯之類是也。熱毒者清其脾瀉其熱。連翹消毒飲之類是也。氣毒者調其血和其氣。藿香正氣散之類是也。瘰癧者散其堅。和其血。散腫漬堅湯之類是也。筋癧者清其肝。解其鬱。柴胡清肝湯之類是也。痰癧者豁其痰。行其氣。芩連二陳湯之類是也。又有寡婦尼僧。鰥夫庶妾。志不得發。思不得遂。積想在心。過傷精力。此勞中所得者。往往有之。最爲難治。宜先養心血。次開鬱結。益腎安神。疏肝快膈。

如歸脾湯。益氣養榮湯。俱加香附青皮山梔貝母木  
香之類是也。又男人不宜太陽青筋潮熱咳嗽。自汗  
盜汗。女人又忌眼內紅絲。經閉骨蒸。五心煩熱。男婦  
有此後必變爲癆瘵難治之症。體實者初起可服散  
腫潰堅攻利之藥。得效者十中三四。有不察虛實。盡  
劑追伐損傷元氣。致成壞病者十有八九。此非患者  
之命。自由誤於醫人之手。予常治初起成核。服前藥  
未效者。用針刺核內深入三四分。用冰蠅散撲成條。  
插入核內。糊紙封上。待至二七後。核子自然落出。隨

用紅黑二膏搽貼。內服補劑。不久便愈。常見有用斑  
蝥牽牛巴霜大黃等藥追蝕。多致危亡。切宜戒之。

徐曰。此篇論甚詳備。

又曰。實症結痰。乃可用冰蠅散。此方本治此症之  
藥也。

楣案實症結痰。用冰蠅散。不若用余所製消核膏。  
爲妥。仍須內服子龍丸。卽挫涎丹方見卷二  
消核膏方見後

瘰癧看法

初起核高腫。痛色紅軟活。微作寒熱。肩項不強者順已。

成根不堅硬。內無小核叢生。脾健氣血不衰者順。已潰膿稠。肉色紅活。核腫漸消。肩項自便。漸斂者順。潰後易消易斂。氣體平和。胸膈寬利。飲食知味者順。未成形體消瘦。寒熱往來。結核頑硬。痰嗽相兼者險。已成核堅。連續如珠。大小不等。項強筋急。脈虛者險。已潰膿水清稀。肌肉消鑠。自汗盜汗。寒熱不睡者逆。潰後陰虛。煩躁作渴。大便泄。小便秘。男子骨蒸。女人經閉。俱逆。

徐曰。看法與別症同。

瘰癧治法

初起腫痛。憎寒壯熱。四肢拘急。項強頭眩者。表散之。腫硬發熱。便利口乾。胸膈不利。惡心脈實者。宜利之。膏梁厚味。醇酒積熱。溼痰凝結而死者。宜化痰降火清中。憂思過度。鬱怒傷肝。筋縮結核者。宜養血開鬱疏肝。房慾勞傷。陰虛暑熱。自汗咳嗽。形體消瘦者。滋腎健脾。失利亡名。懷抱鬱結。積想在心。所如不得。乖隔陰陽。虛熬歲月。而得者。精血俱傷。先養正氣。次治標病。堅而不潰。腐而潰之。潰而不斂。補而斂之。皆活法也。

瘰癧治驗

一男人項核腫痛。拘急惡寒。用荆防敗毒散二劑。表症悉退。餘核不消。用散腫潰堅湯加川芎香附貝母十餘服。其核漸消。外以琥珀膏貼之。月餘而安。

一男子仲冬渡江。暴冒霧氣。又值驚恐。次日寒熱交作。頭面耳項俱腫。先用藿香正氣散二服。寒熱卽止。面腫漸消。惟項間堅腫不退。紅掀作痛。此毒聚必欲作膿。仍用正氣散加芎歸皀刺數服。俟膿熟針之。腫痛頓退。又用十全大補湯。脾健肌生完口。

徐曰。此風痰之毒。只宜內消。亦不必用十全大補。

湯。

一婦孀居六載子幼未立憂鬱成核已半年兼經水不調寒熱交作形體消瘦脈亦弦數此勞傷氣血肝火妄動而成所謂損者益之不可用追蝕之藥損而復損先用逍遙散加香附牡丹皮貝母和其血脈疎其肝氣寒熱盡退次用益氣養榮湯服至月餘氣血漸復經事漸調元氣漸醒外用火針徐曰不必核上點破四孔用黃線藥插入五六次以上九字徐勒候至孔大換用冰榔散搽核上封之至十三日外其核自落外搽玉紅

膏。生肌收斂。內服人參養榮湯加香附木香三十餘劑。其口自完。此婦慎起居忘七情。戒口味。盡調理。故可得愈。否則必不能矣。

一室女年十七。因父擇婿未遂。耽至二旬。懷抱鬱久。項生數核。堅硬如石。此肝經凝結筋縮之病也。兼經水斷絕。寒熱如瘧。咳嗽脈數。惟不顴紅。此陰虛火動已成勞瘵症也。非藥能愈。視其形狀。喜無敗色。余曰。欲治此病。當先治其心。父問曰。何藥治心。余曰。非藥也。易曰。天地絪愾。萬物化醇。男女構精。萬物化生。此天

地男女生成化育之道也。斯病起於孤陰寡陽不生  
不化。所謂逆理之病。由於女大失配。是謂當至而不  
至。漸成失度之候。此句徐圖其病不生而自生。故藥不能  
挽回。必得陰陽和而雨澤降。此句徐圖夫婦和而家道成。

斯時方可用藥。其父始悟。隨卽擇嫁三月後復請余  
視。前症稍定。先用逍遙散加香附青皮山梔丹皮貝  
母十餘劑。開鬱疏肝。寒熱漸止。次以人參養榮湯加  
丹皮紅花。通其血脉。使心血易生。容顏稍澤。又用益  
氣養榮湯倍參。水徐曰不必培助脾胃。增進飲食。間用歸

脾湯加麥冬五味遠志沙參收斂神氣寬慰性情。又製參术地黃膏服至半年精神頓復經事亦通。惟核不能全退用火針點破一核。火針點破四字徐勒琥珀膏貼之。

漸腐爲膿。又兩月而得收斂。尚有三核。亦漸針漸潰。漸斂。首尾純用補脾開鬱藥。調理一年始得全愈。

徐曰。室女患此者。嫁後卽愈。十居五六。此人竟能知之奇哉。

一男子年近三十。項生數核。面白神疲。皮麤脈數。此元氣受傷之症。先當補養氣血。待根本壯實。再治其瘡。

隨用養榮健脾藥十餘劑。未效。彼以爲緩。徐曰此等

又爲方士所惑。冀圖內消。自服斑蝥巴麝之藥。徐曰人極多自取

其死連瀉十數行。後致小便淋漓不已。更增虛熱。飲食

減少。又復請視。形色已敗。辭而不治。又請內科強投扶助降火之藥。終不應而死。

一婦壯年性急。夫蕩不爲家。左項生核半載。漸至雞卵大。堅硬如石皮。外紅絲纏繞。左右脈俱弦。數弦屬肝火妄動。數乃脾熱之甚。徐曰此本不治之症。以後半愈而根不除。所以復發卽治得法。尙難收功。況誤治乎。先用梔子清肝湯平伐肝木。五服而脈

搏斗正宗卷五 瘰癧

始平。又用清肝解鬱湯數服。散其鬱結。次用益氣養榮湯。調其氣血。間服散腫潰堅湯。軟其堅腫。外以琥珀膏貼之。調理百日。元氣乃復。堅硬已消八九。只存小核。彼以爲愈。止不服藥。後一載。因夫賭訟未勝。暴急驚恐。前腫復作。兩手脈細而多數。此陰血虧損。陽火乘之。非前有餘症也。又兼胸膈不利。飲食無味。經水先期過多。形容憔悴不澤。此神傷於思慮。則肉脫。意傷於憂愁。則肢廢。魂傷於悲哀。則筋攣。魄傷於喜樂。則皮槁。志傷於暴怒。則腰脊不能俯仰。以上俱七

情內損症也。法當滋養氣血。調和脾胃。益腎清心。開  
鬱散滯。庶保無虞。彼不肯信。仍欲服散腫潰堅之藥。  
并灸腫處以圖內消。余辭不治。彼請客醫仍服前藥。  
灸腫處。并灸肘尖。真氣虛而益虛。邪氣實而益實。反  
加發熱自汗。咳嗽項強。四肢不收。灸瘡無膿。血水不  
絕。腫亦熾盛。致成臟腑已損之候。又傳爲氣急聲啞。  
痰血交出而歿。余嘗見病家及庸醫不辨虛實。妄行  
用藥。多致不救。所當猛省。

楣案中間引成語爲文。其實此症無喜樂。

瘰癧主治方

防風解毒湯

防風解毒湯荆桔  
薄荷枳殼芎蒼朮

牛蒡連翹草石膏  
知母燈心共可消

治風毒瘰癧寒暑不調勞傷湊襲多致手足少陽分

耳項結腫或外寒內熱痰凝氣滯者。

防風

荆芥

桔梗

牛蒡子

連翹

甘草

石膏

薄荷

枳殼

川芎

蒼朮

知母

各一錢

水二茶鍾燈心二十根煎八分食後服。

徐曰此風痰之方。